

tangria maku

'esi na tarisinata, kacaua kükunang marisinatü. tangria maku kavangvang sua nguani. nakai 'una tacini makai vai manung tangria. Pakisia sua nguain. niaranai namanamarü mucimü. arakukunu kimia marisinatü. arakukunu kim kiatuturu kari Kanakanavu, sumasima'ü, paracani. 'itumuru maatua ka'anmana mia. tuiisua cu tangria.

manmaan kavangvang kim sumasüperü sinatü. 'una kari makasi, “muraceni mucaca, süperü me'i sinatü”. kari isi, 'esi mapurai kitana. avara'e nanu tia kiatuturu. tia pa sumasüperü 'itumuru sinatü. pamavakan tacü'ura mita. pacakuarü macurang mita. makai kiatuturu kari. manmaan ku kiatuturu karananana kari. tangria maku isi, tavana'ü kari Pakisia. 'apanapa nguain tumatuturu 'ikua. tavana'ü ku masiKanakanavu, 'apanapa ku tumatuturu vinia.

tangria maku isi, iaavatu na cimü. ka'anü pa macasü taniara. 'itumuru pa koo nikusaa kee. paira makasi 'ikua, avicio kani mucacaca. 'una ucani tarasangara. aviciün maku mukusa 'umo'uma mia. ka'anü araceni, ka'anü aracan curu. 'urukuku kim mucaca. maica na nungnung ti'ingai. tarasangai kim 'inia. tükü canumu. tupuru kim na

cikiringa. tavana'ün cumasü'ura vutuukuru, 'arasakai, 'apasü, sikara na canumu makananguru. makasi tangria, koo pa kani cinimü'ura makasia maningcau nungnung!

tuturuün maku, cau tanasün mia 'esi kipatusü miacara nungnung isi. makacüküna 'umo'uma. 'apasü'ürün maku nipacüvüra karavung, takuisi, tutui, tarukuka. mara nguain cünü 'apakünü nguani. makasi, cucuruana kacangarün. tuturuün maku makananu mumuku tammi, rumarapü vina'ü. macani pa nguain matu'usu putukioa isi.

muvü. ke cu taniarü. makacükünü cu kavangvang cuma mataa cina. nimavici 'angirisi, 'aramü tarukuka mataa vutuukuru. moon cu kim taru'an cumacapa. takutavara'ü kinvavara maku, 'esi kim cumacapa 'aramü. marivivini kavangvang iaavatu. makasi tangria maku, cucuru kani macangcangarü soni. pasiün maku, 'akuni maraini! macangcangara cani pininga maku arakukunu kusua.

(文章大意 僅供參考) ※字數限 200 字

我的朋友

在學校我有許多同學，有一位像手足一樣的好朋友，我們一起學習語言、玩耍、唱歌、看書，「行萬里路，讀萬卷書」這在勉勵我們處處值得學習，還要閱讀許多書籍增進視野、豐富知識。有個假日，我帶他去田園，途中經過小溪流，魚、蝦、螃蟹在水中游著，那是族人保護的溪。到了田園，我讓他拿著草來餵食牛、羊、豬、雞，還教他種植地瓜，播撒小米。中午餓了，爸媽帶了豬肉、雞肉和魚來，我們一以在工寮烤肉，今天是朋友最高興的一天。